



Il dirigent nouv, Ivan Nussio cun sias musicantas e musicants.

Concert our il liber a Scuol

Davo duos ons maigers cun pacas prouvas e bod ingü-nas rapreschantaziuns es sdsadada la vita normala eir pro la Società da musica da Scuol. Venderdi saira ha gnü lö ün concert giò Plaz cun ün program musical varià.

BENEDICT STECHER/FMR

La pandemia da corona ha miss suotsura d'ürant bod duos ons la vita publica e muossà cha quist virus ha pisserà per blers inconveniaints sün tuot il muond. Eir musica e chant han in quel temp stuvü succomber e desister da prouvas e rapreschantaziuns. Tant plü cuntaintas sun uossa societats da musica, cors, gruppas da musica ed oters plü chi regna darcheu tantinavant üna vita normala. Il concert giò'n Plaz a Scuol Sot da venderdi passà ha attrat a bleras amaturas ed amatuors da la musica chi han giodü in cumünanza üna saira paschaivla dominada da buna glüna. Cun schlantsch e plaschair han las s-chars 40 musicantas e musicants preschantà cun lur dirigent *Ivan Nussio* e cul vicedirigent *Reto Mayer* ün bel püschel da marchas, musica da film ed eir da musica plü moderna. La musica da Scuol chi exista daspö l'on 1904 dispuona sper instrumaints da tola eir da blers instrumaints da lain ed as preschainta sco armonia. Actualmaing as vezza illa musica da Scuol eir diversas musicantas e musicants dad oters cumüns (fracziuns) chi rinforzan la società suot il motto cumünanza dà forza.

Program varià

Il dirigent nouv Ivan Nussio ed il vicedirigent Reto Mayer han preschantà ün program fich varià cun marchas, polcas, musica da film, swing ed oter plü. Per exaimpel tocs sco *The Phantom at the Opera*, *City of Stars*, *Amparito Roca*, ma eir *Böhmisches Blut* e divers oters. Eir pro tocs plütost calms d'eiran ils visitadurs, chi stavian in pè, quiets ed han giodü las bellas armonias e solos. Il salüd ha sport la vicepresidenta dal cumün da Scuol *Aita Zanetti*. Üna bella surpraisa es stat cha'l cusglier guvernativ *Jon Domenic Parolini* insembel cun sia duonna *Susanna* han sport ün aperitiv a tuot ils preschaints. Sco cha'l president da la Società da musica Scuol, *Dumeng Spiller* ha dit vaivan els tscherchè ün dirigent nouv: «Cun Ivan Nussio da Brusio vaina chattà üna buna soluziun, el ha dirigi ils giuvenils dal Puschlav, ma eir la musica gronda. Sco vicedirigent vaina a Reto Mayer chi cugnoscha las relaziuns da la Società da musica Scuol fich bain.»



Il cusglier guvernativ Jon Domenic Parolini ha offert ün aperitiv per tuot ils preschaints.

FOTOSBENEDICT STECHER